



國朝耆獻類徵初編卷二百二十一目錄

守令七

官朝京

甯枚

張墉

李漑之

張朝案

魏一黿

劉三德

陳待舉  
邱上荃

許宏勳

邱公

何源濬

王大業

弟大呂

吳晟

王斗機

王吉武

文超靈

秦松華

季麒先  
高洪

張浩  
王世濟

秦松如  
陳大經

楊銘敦  
吳道鐸

祝增

曹泰曾

張曾祺

趙璉美

張聲遠  
許湄

王之佐  
閻士魁

補錄

王吉武

官賜京

南外

縣一

縣一

官合子

四庫全書總目卷一百二十一目錄

目錄

國朝耆獻類徵初編卷二百二十一

通奉大夫前署江西巡撫江西布政使司布政使湘陰李桓輯  
守令七

官朝京

君諱朝京字子孟泉州安溪縣人家福村近李文貞所居湖頭康熙丙辰耿精忠既就俘而山海之寇復起妖人蔡寅聚眾數萬行過不供資糧者輟以徇官氏聚族而居時君已舉於鄉爲族黨之望檄至子弟家僮環泣莫知所爲君峻拒之而戒眾保險會沈陰賊未至爲李文貞鄉兵所挫福村無擾由是義重於鄉逮其孫曾故老語及君猶肅然君始爲莆田教諭郡守知文貞重君聞君貧

食少食而多糜俾攝縣令及鄰邑教官家人私慶衣食自是可少  
充而在莆九年盡室餽糜無改也戊辰遷晉州武強令會遼陽于  
公成龍巡撫直隸喜猛鷺吏急催科而君屏鞭扑下牒詰責不爲  
動方是時耗羨尙未歸公有司皆謂已物也而君獨自刻苦用代  
貧民輸不及額者終君之任邑賦無虧君歿五十年其曾孫獻瑤  
成進士改庶吉士歸葬其親以表君之墓請曰墓故有誌皆泛語  
無可採者而瑤所聞於父祖者略如此叩以不載誌銘之由曰拒  
山賊不敢尸名以蓋鄉里先曾大父之志也爲邑宰則事多忤於  
大府時于公貴盛故銘者以爲難且曰瑤事先生久未有妄語於  
前武強近畿士大夫可周諏也鄉邦則耳目眾著敢以疑事溢言

爲曾王父滋口實哉瑤之請有辭其事皆有迹可稽故不辭而爲之表君王子舉人卒年七十有二墓在近村世雅山妻某氏附子五人獻瑤世受重其父緝熙大父式孜系曰

余方成童見里塾中爭傳孝感熊公陳時事劾輔臣疏睢州湯公之歿也堯峰汪氏誌其墓於奸僉構陷直言無隱其後二家文集於疏中指要芟薙無遺誌則目存而空其籍異哉告君之言銘幽之文當其時無懼也而事後乃欲泯其迹不亦悖乎自是以後昧者遂奉爲標準凡士大夫直節昌言槩不敢以著於狀誌不知爲狀誌而蔽晦其先人不若無之爲愈而綴文者言之無物益庸庸不足以自存故因表君之墓而並著之使爲人子孫及受其請而

筆之者知所裁焉

右墓表方苞撰

甯枚

甯枚字卜公一字雪山父洵國學生母范太孺人祖時謨萬厯己丑進士官兵部職方司員外郎公本甯鳩山人滋長子也嗣於母范太孺人孺人撫養辛勤不啻己出而公亦曲盡孝敬數十年如一日少補諸生性警敏讀古今文每洞悉大義與從兄林蜚聲左輔稱連璧負質清淑爲人雅淡和平才思贍穎康熙壬子領賢書試文高簡超逸雅似潁川諸墨爲時所重丁丑謁選授浙江龍泉令龍泉在括蒼萬山中縣僻而事復不減公仲冬莅任累歲積贖案無滯畱士民以公仁人長者愛如父母公亦思所以興利除弊爲一邑措置不意戊寅正月泛舟方還無病卒壽七十有四卒之

先夕民有夢公如城隍廟者次日卽爲邑城隍誕辰遠邇老幼垂涕以爲我公將血食茲土耶嗟夫今之士稍有才氣知句讀者率多蘄拔岸異之行公獨溫溫藹藹謙退安詳不爲放言高論略似得柱下一端者厥後卜居小郭村廉靜寡欲每獨坐終日不出一語亦未嘗以一語忤人與鄉曲父老相爲勸勉慰勞人多引重有彥方叔度之遺風焉人傳公家居時值天旱鄰舍兒有盜其稷穗至一畝者以告公公曰彼必苦無食耳次日復盜之家人以爲憾將訟之縣公曰彼前食量已虛也人相述以爲雅談云

右傳康无疾撰

張壩

鄒平東郭張氏兄弟九人讀書績學雁行而肩隨如昔所稱荀氏  
公沙氏者已而長公新野君璽報最需次臺省病卒季公孝廉塤  
登鄉薦先卒今次公雄縣君報最受代有日矣而又卒其卒慘甚  
論者皆以爲天道不可問靈均呵壁有更端不可殫者卽予亦不  
能無疑予與君外兄弟也幼相習君之孤秉鉦等以誌來請詎忍  
例辭君諱壩號西園石宗其字曾祖奇策前誥贈甯武道山西按  
察司僉事祖毓泰天啟壬戌進士仕至江西布政使司右布政使  
父景榮順治乙酉拔貢以君貴 皇贈文林郎雄縣知縣娶於王  
前巡撫應天兵部右侍郎立字公象恆女卽予從姑也有子九人

君居次君風神玉立少讀書家塾與兄新野令寶庵齊名寶庵先  
以己酉捷京闈乙丑成進士壬子君始以選拔貢入太學而其弟  
翕仲墳蓮岳垓連翩而起君復與之適軫齊軌文譽益高戊午鄉  
試翕仲魁其經君復被落會予官國子祭酒君來肄業成均爲旗  
下生徒教習乙亥除雄縣知縣雄古易京所稱燕南垂趙北際者  
也地當綰轂之口而旗民雜處尤號難治君固仁人政尙清簡俾  
旗民不相凌競有古比閭族鄰之風縣居九河下流眾水所歸民  
賴拯蒲龜魚之利庚辰諸淀水涸昔之澤國盡爲膏腴民爭趨之  
或相詬諍君履畝定額紳士編戶較若畫一豪強不得兼併眾歌  
詠之明年有永定河之役畿內諸州縣丁壯畚鍤勿敢後時君獨


力請修縣南隄工是役也雄民獨免徵發縣人德之隄成名之曰  
張公隄予以辛巳 予假過雄二十里閒隄路如弦高柳蔭之數  
十步輒作一橋上通輪蹠下通舟楫風帆往來若歷堂序於是歎  
君之爲政有召杜之風非但以簿書筐篋爲能者也癸未以肅清  
驛站 特旨超遷予在京師方日夕企君至而忽驚聞逆奴之變  
爲廢眠食嗚呼以君之生平孝於親友於兄弟居官則豈弟馭下  
則寬仁可謂君子善人循吏者也而竟以此終天耶人耶吾不得  
而知之矣夫光武漢誼主也竇建德草昧之雄也光武至侯蒼頭  
子密而建德能立誅滑州刺史王軌之奴滑人感動卽日而降予  
嘗讀史而慨然孰謂光武顧出建德下哉 國家法律嚴明立正

梟獍之誅稍可瞑君目於地下吾終爲天道惜耳君固工文楷書  
尤圓美秀勁有大令之法夙昔力行功過格好行其德贈公歿與  
其兄力支門戶外侮內難卒不得逞事多可書今略其大者俾鑒  
諸隧道之石千秋萬世必有爲咨嗟太息而撫膺者也君生以崇  
禎辛巳正月二十二日卒以康熙四十二年八月十六日得年六  
十有三配王氏繼配韓氏男子五人秉鑑庠生先卒秉銓庠生先  
卒秉鈺廩生秉鏐庠生秉鑲女子三人一適張億維一適畢世堆  
一幼未字孫男三人原澐原澤原涇以康熙四十三年十一月某  
日葬某阡銘曰

黃鳥哀良人百其身何梟獍肆狂戕厥鳳麟天道茫昧孰知往因

降祥降殃孰爲屈伸長白蒼蒼小清粼粼祕此黃腸永安千春

右墓誌銘王士禎撰



李漑之

墓有表古也蓋自漢元初五年謁者景君始其崇四尺其制圭首方趺其文由左而右誌石納諸壙中而表立於既葬之後所以表封陌限樵牧述功美禮不可以廢也兩淮都轉運使掌鹽法道事長山李君斯佺請表厥考灤州府君之墓表曰公諱漑之字岱源世居濟南之長山曾祖迺春以孫貴 諸贈光祿大夫太子太保兵部左侍郎都察院左都御史祖夢鳳以子貴 贈如其官考化熙累官光祿大夫太子太保刑部尙書妣一品夫人沈氏公少習春秋年十五補學官弟子尋以廕入國子監尙書公方仕於朝祖母宋里居公婉容柔色晨昏定省問何食飲慈以旨甘奉養者

三載深得宋太夫人歡心忘其子之在朝也尚書公旣予告  
公亦不謁選人建芝煙閣於堂之左置經傳子史法書名畫枕籍  
其中與合志同方之友日事搜討旁及天官地志九流百家二氏  
之說靡不審其是非正其紕繆旣而尚書公病劇公晝夜沈憂疽  
發項繼以疾痾沈縣不離衾枕已無意牽絲奉檄矣吏部按籍除  
知灤州灤故畿輔地俗悍難治公至鉏强抑暴御胥吏以嚴愛民  
若家人父子節用以示儉鹽豉蒜果堂廚無大烹會天子時巡  
幸灤公力除官道峙糗糧羊豕禾秬悉出自廨舍錙釐圭黍不擾  
民間公故多鬚畿輔稱廉吏者必曰髯知州云及期以盜案罷公  
之官於灤也尚書公在堂去州治幾二千里每三五日輕郵密驛